

NWER NYI BO NYONO TV ANEBE HIBRU

Mmon no Esowo

¹ Mahne mahne Esowo jo bungu tong babnso ejahre go ajoobo abang nkpel tvv, sehng go anyo nya abanyehnamahr.*

² Es'kohro ngare nyia á bungu a nahre sehng goji Mmon ewe,† ye ji á yehk-e no re á bahke lehke elkv nsol kpee. Ye wo á ko-e no lim njini.

³ Á kp'yake tib ellub ni Esowo. Á li na li ful ful fuul ana yefono Esowo.‡ Alum enye nya kpi nsahm nyi kp'wahnge nsol kpee kp'jene go nseenge.§ Eji á ma ru ane, bo ma bar go bo abiafem, owo á kehm song ji go eboblum Esowo bi gbale sehng, bi li go ero.

Mmon Esowo wo ga gbal sehnge babenjel

⁴ Anv, Mmon Esowo ebfere gbal sehnge babenjel, eji á ma bel mbing nyi nobo sehnge nyi bo.*

⁵ Esowo ka tong a tong enjel anyehng anyehng re,

“Wo mmon ewame wo,†
lela wo, m ma jol Nso.”

Jol á ka tong a tong enjel anyehng anyehng re,
“M bahke jolo Nso,
a bahke jolo mmon ewame.”

* **1:1 1:1** Mat 11:13; Luk 1:70 † **1:2 1:2** Gal 4:4 ‡ **1:3 1:3** Jon 12:45 § **1:3 1:3** Kol 1:17 * **1:4 1:4** Elt 4:12 † **1:5 1:5** Mak 1:11

⁶ Eji Esowo yahke ba ngbokambang a mmon ewe tum tv go njini, á kpe bung re,
 “Nong, babenjel nya Esowo kpee kak-e.”

⁷ Esowo bungu bade babenjel re,
 “Esowo kpo lim enjel enye, bo jol nfeb,[‡]
 fere jo lim alokeltum ebe, bo jol nlikagun,”

⁸ fere bung bada Mmon ewe re,

“Eti etul eja,
 o Esowo, li go njinanjini.

Á kpo fili ejahbetul eja go etingitingi.

⁹ Etingitingi ji kpo kor-a,
 ebi jo sab-a.

Owo wahnge, wo Esowo,

Esowo eba ma-a kak akehng go esi, mao ma
 eyebatahng,

aji a l'gbal sehng abonane.”

¹⁰ Esowo kpe bung re,

“Wo Ntul, wo wo limi njini go mbomannahb.

Elbung ni li ejum ji a limi go ega abo.§

¹¹ Nyaa kpee bahke male, wofono antahng wo
 bahke sake.*

Nyaa kpee bahke kulu ana mbomo.

¹² A bahke fehde elbung abola ndi ana ekpawobo,
 bahke fere yaange.†

A bahke jolo ano ano,

a nehm tiki kul.”

¹³ Esowo tikem tong enjel anyehng anyehng re,
 “Ji go egame ejang eboblum
 tete me n lim anebekv eba etikunakpade eja.”‡

‡ 1:7 1:7 Ell 7:1 § 1:10 1:10 Jon 1:3 * 1:11 1:11 Mat 24:35; Jon
 1:1 † 1:12 1:12 Ell 6:14; 21:1 ‡ 1:13 1:13 Luk 20:41-44

¹⁴ Anv, ane aba li babenjel? Bo kpee atohko nya kpo loko eltum nya, nya Esowo kpo tum bo re bo song kak ane ebo, ba bahke bele eltahre.§

2

Egburu eltahre

¹ Ano wo wahnge nobo re wahr jo sahb k'kunu ekpu go nsol nyi e ma wuk, eji e l'k'fab tahm.

² Eji etib bi babenjel jo tiingi yiimi no, nne awohng awohng no l'soodo, afi á bumem alum nyao, á jo nyehne erem ana fuumu no re á nyehn,*

³ anv, e bahke limi renan kehm beke for, e l'gbake egburu eltahre ana nia bum go nkpe, ni Ntul ewahre gbo mbang tiingi?† Ane ba wuk-e no, ba ma tob ba tong-r re li go etingitingi.‡

⁴ Esowo tob yiimi ntianse, eji á jo tib nliingi nyi nsahm enye, fere lim ajoobo akpokosi,§ fere bak ane ayare nya Etingi Etohko ana kor-e no.*

Ane ba ga gbal sehng babenjel

⁵ Tibre Esowo faakem a njini nyi kp'bake nyi e kp'bungu bade kak babenjel go elwo.†

⁶ Edi nwer Esowo ajehng bungu re,
“Nne awo li li nne no Esowo bahk-e jo tiiri?
Nne awo li li Mmon no nne no a bahk-e jo kunu ekpu?‡

⁷ A lim-e á jol rede rede sehng babenjel mmon-gare ntiil,

§ 1:14 1:14 Elt 5:19; 11:13-14; 27:23-24 * 2:2 2:2 Hib 10:28

† 2:3 2:3 Jon 12:47-48 ‡ 2:3 2:3 Luk 1:2 § 2:4 2:4 Jon 10:25

* 2:4 2:4 1 Kor 12:8-11 † 2:5 2:5 2 Pit 3:13 ‡ 2:6 2:6 1 Pit 1:24

a fere ka-e ellub, a ekpunu ji li ka ntul. §

⁸ Wobbum ejum ajehng ajehng re á kunu akpade.”
Ana Esowo ma yake ejum ajehng ajehng kak-e go elwo, ejumjum limm, ji á tahme sa, ji ki-e wob go elwo. Anv, e kp'nyehne re, ngare ka rehng nyi nsol kpee bahk-e woomo go elwo.*

⁹ E kp'nyehne Jisos ji Esowo lim-e, á jol rede rede sehng babenjel go mmongare ntiil, eji á l'kpo go esi ane kpee, tib go nnoobo nyi Esowo. Anv, Esowo m-e ka ellub, a ekpunu ji li ka ntul tib go erem bi á nyehne no, fere kpo.

¹⁰ F'fuumu re Esowo rod erem bi Jisos nyehne no, lim-e á jol go nseenga nseenge, ye ji wahng nsol kpee li no, ye j'nehm wo Esowo ko-e, lim nsol kpee, eji á l'ko abon gbalee tahm a bo go ege ellub. Tibre Jisos wo wahng re bo bel eltahre.

¹¹ Ye ji kpo lim ane, bo jol ebo ebo, a ane ba á ma lim bo, bo ma jol ebo ebo, bo kpi nde na awohng. Owo wahng á kil kpe nyaare bo, á kp'fere jo lung bo re abonanyehn,†

¹² ana á bungu no re,
“M bahke bungu bada mbing enya tong abona-
nee.

M bahk-a tehke go elkab aneb Esowo kpee.”

¹³ Á kpe bung re,

“M bahke bumu Esowo go etingitingi.”‡

Á kpe tob bung re,

“Nyehn me ga, a abon ebame ba Esowo ma-m ka.”

¹⁴ Tib eji abon bao kpi ngubjing, a alung, Jisos kehm tob ba jol ana bo, fere bel ngubjing, ba

§ 2:7 2:7 Fil 2:9-11 * 2:8 2:8 2 Tes 2:1-3 † 2:11 2:11 Jon 20:17

‡ 2:13 2:13 Mat 27:43

ranng'e nnehm nyi elkv wob-e go elwo, tib go ege elkv,§

¹⁵ fere tahre ane kpee yake, ba jolo aju ngare nyi bo jolo go elkpin tib go elfahle ni bo jo fahl elkv.

¹⁶ Tibre etingitingi, á kpehme kak babenjel ebo. Abon ba Ebrahim ba, á kpo kak bo ebo.*

¹⁷ Ano wo wahnge Esowo limi Jisos re á jol ana abonanyehn go mbang anyehng anyehng, eji á l'jol nkakesehk a ntubesi abalimajom no kpi ndon go elloko ni á kp'loko Esowo,† fere gongo Esowo tib abiafem nya ane.

¹⁸ Tib eji yefono antahng jo nyehn erem, bo fere gar-e, anv á bahke ma kak ane ebo, ba l'yel go elgaare.

3

Jisos wo ga gbal sehng'e Moses

¹ Abarebare abonanee ba Esowo ma-n tob lung, jo seengen Jisos ji li ntiingetib, a ntubesi abalimajom no e kpo yiimi ntianse ka-e.*

² Á bele ekakesehk, taame tv nne no yehk-e no kak go eltum ene, jang jang ana Moses bele ekakesehk go eltum kpee ni á jo lim go etahk Esowo.

³ Jisos wo fuumu re á ga bel ellub sehng'e Moses, jang jang ana nne no si etahk ga kpi ellub sehng'e etahk ji á si no.

⁴ Tibre etahk ajehng ajehng nne wo sii. Wo, Esowo bi li nne no limi nsol kpee.

§ 2:14 2:14 Jon 12:31 * 2:16 2:16 Gal 3:29 † 2:17 2:17 Hib 2:10; 4:15 * 3:1 3:1 Hib 12:2; 4:14

⁵ Moses bele ekakesehk go eltum kpee ni á jo lim go etahk Esowo, ye ji jolo nlokeltum, eji á l'yiimi ntianse ka nsol nyi Esowo bahke bungu go ngare es'song.

⁶ Wo, Kraist bele ekakesehk go eltum ni á limi go ege etahk, ye ji jolo mmon. Etahk eje jio, wahr ba,[†] e l'yiimi t'tahne go esahb, a elgeere ni e kp'geere kak nsol nyi e kp'kunu ekpu tete rehng go es'kohro.

Jo kunen ekpu, eji n l'k' yake Esowo abo

⁷ Ana Etingi Etohko bungu re,

“N l'wuk alum enye lela,

⁸ kana tahne asi enyahne ana babnso ejahne limi
no

efung elgaare bio bi bo ten-m no go elka emahng.

⁹ Go wo bo wuung-m no,

jol eji bo nyehne nyehn nsol nyi n limi go nnya
atahl abal.

¹⁰ Ano wo wahng ka atahng rak-m no tob ane bao,
n kehm bungu re,

‘Bo kpo kono elsoodo go bo a ntir atahng.

Bo ka tiki kahn mbang enyame.’

¹¹ Owo n kehm tiri go egame erakatahng re,

‘bo nehm tiki yel go egame edi erekekv.’”[‡]

¹² Abonanee, jo kunen ekpu, eji nne awohng
awohng ewahne l'k'bel ebi eltim ni á kil taame,
toono o, á sennge Esowo bi kpi elkpín njahm.

¹³ Jo rehken atemtem efung abehng abehng,[§]
eji ngare kpeke li nyi bo kpo lung re, “lela”, eji

[†] 3:6 3:6 1 Pit 2:5 [‡] 3:11 3:11 1 Kor 10:5-11 [§] 3:13 3:13 1 Tes 5:11

nne awohng awohng ewahne l'k'tahne esi tib go elnehme ni abiafem kpo nehm ane.

¹⁴ Wahr ebjol ane ba kp'kodo eljen a Kraist, e l'jabb-e t'tahne, fere bum-e go etingitingi tete rehng go es'kohro, ana e bomo go mbomo,

¹⁵ ana nwer Esowo bungu no re,
“N l'wuk alum enye lela, kana tahne asi enyahne,*
ana babnso ejahne tene Esowo mahne.”

¹⁶ Anv, elkohn ane aba wuku alum Esowo, fere ten? Ane kpee ba Moses yehke bo go Ijib sanga?†

¹⁷ Anv, ane aba Esowo rake atahng tob bo go nnya atahl abal? Ane ba limi abiafem, fere kpo go elka emahng sanga?

¹⁸ Anv, ane aba Esowo tiri re, bo nehm tiki yel go ege edi erekekv? Ane ba ki taame sanga?

¹⁹ Wahr ebnyehn re, bo maam yel tib go bo ek'taame.

4

Edi erekekv ji Esowo

¹ Enyam bi Esowo nyame no re e bahke yele go ege edi erekekv bia, kpeke li. Nong, wahr jo fahlen, eji Esowo l'k'tong nne awohng awohng ewahne re, yebsa go njahm.

² Tibre wahr ebwuk nnoobo etib, jang jang ana bo. Etib bi bo wuku no kaam bo nnoobo anyehng anyehng, tibre bo ji wuku no joom taame.

³ Wo, wahr jia ji ma taame, wahr ba kp'yele edi erekekv jio. Ana Esowo bungu no re,
“Me n tir go egame erakatahng re,

* 3:15 3:15 Elt 24:25 † 3:16 3:16 Mat 7:21

bo nehm tiki yel edi erekekv ejame.”*

Eji Esowo limi njini, ngare nyi eltum ene ma mal,
 4 á kehm bungu bade efung bi biingi nfung esehma re, “Efung bi biingi nfung esehma, bi bi n re ekv go egame eltum kpee.”

5 Edi nwer Esowo jehko, á kpe bung re, “Bo nehm tiki yel edi erekekv ejame.”

6 Ane ba gbo mbang wuk nnoobo etib yelem, tib eji bo ki taame. Egom jehko jia, ji bahke yele ona.†

7 Tibre Esowo ebkpe kunu afung nya á jo lung re, “lela”. Eji ma kang ekidi ma lab, á bungu alum nya e ma tohko bung a, sehng go nnyo mi Devid re,

“N l'wuk alum enye lela, kana tahne asi enyahne.”

8 Li re Josua k'ka bo erekekv jio, kehn eji ma kang, Esowo jolem kpe bung bade efung bindiki.

9 Fvfo, erekekv jia, nong kp'siki aneb Esowo, ana Esowo re ekv efung bi biingi nfung esehma.‡

10 Tibre nne awohng awohng no l'yel edi erekekv ji Esowo, á kp'tob re ekv go ege eltum, ana Esowo re ekv go ege eltum.§

11 Nong, wahr noken, eji e l'yel edi erekekv jio, nne awohng awohng k'gbo ana ane bao gbo no tib go bo ek'taame.*

12 Tibre alum Esowo kpi elkpín, kp'limi eltum. Kp'kongo sehng ekahngkahng abehng abehng bi kpo kong njahm ebal ebal. Kpo jahm nne, yel r'rehng atahng edi ji eltim, a etohko song wane,

* 4:3 4:3 Hib 3:11 † 4:6 4:6 Mat 11:28 ‡ 4:9 4:9 2 Tes 1:7

§ 4:10 4:10 Ell 14:13 * 4:11 4:11 1 Kor 10:5

a adi nya akahb song kono, nya nya li nl'lame no kpo lam ntir atahng a nne, fere jo lam nsol nyi nne ko tir re á lim.

¹³ Ejumjum limm ji li go mbiiri, ji á kil elnyehne. Nsol kpee li gbuul go ege esamahr.† Ye wo li nne no bahk-r bahbe.

Jisos wo li ntubesi abalimajom no nnen

¹⁴ Eji e kpi ntubesi abalimajom no nnen, no sehng elbung sa rehng go ejahbetul Esowo, ye ji li Jisos Mmon Esowo,‡ nong, wahr jabbe nsol nyi e kp'taame tv t'tahne.

¹⁵ Tibre ntubesi abalimajom ewahre li nne no bo m-e wuungu go mbang anyehng anyehng ana wahr. Owo wahng á kp'kahne re, wahr nehme tahne.§ Jol eji bo wuung-e wuungu o, abiafem á limem.*

¹⁶ Nong, wahr belen esahb, jeere kohlo eti etul ji Esowo bi kpi nnoobo.† Owo e bahke nyehne ndon nyi Esowo, fere bel nnoobo enye nyi bahke jo kak-r ebo ngare nyi e l'seb ekakebo.

5

Jisos li nlimanjom ana Melkisedek

¹ Ntubesi abalimajom awohng awohng no bo yehk-e go ellong ane kpo loko Esowo go esi ji ane. Á kpo ko ayare song ka Esowo, fere lim ajom nya abiafem.

² Á kpo guubu ane ba kil elkahne, a bao ba kpo soodo, eji yefono antahng ki tob li go nseenge.

† 4:13 4:13 Jon 3:19-21 ‡ 4:14 4:14 Hib 8:1 § 4:15 4:15 Hib 2:17 * 4:15 4:15 Hib 7:26; Jon 8:46 † 4:16 4:16 Rom 5:1-2

³ Owo fvfo á bahke jo lim njom nyi abiafem enye, fere tob jo lim nyi ane bako.

⁴ Nnene limm, no kpo yehke elne go ege a ngang antahng, fere lim lub ane re, ye li ntubesi abalimajom, sehngem re no, Esowo bi lung-e, jang jang ana á lungu Eron.

⁵ Ano wo fvfo Kraist ki mehl elne wahre re á jol ntubesi abalimajom.* Esowo bi yehk-e no, bi bungu re,

“Wo wo li mmon ewame,
lela wo m ma jol nso.”

⁶ Á kpe bung edi jehko re,
“A bahke jolo nlimanjom go njinanjini
ana Melkisedek jolo no.”

⁷ Ngare nyi Jisos jolo go elkpín go njini nyia, á jo kake ero, fere jo gboongo Esowo, jo rabe eling wahre wahre wahre, jo yehke abonngo.† Á jo kake ero ka nne no bahk-e ma tahre yehke go elkv. Owo wahnge Esowo jo wuk-e, tib go elfahle ni á jo fahl-e.

⁸ Jol eji á jolo jol Mmon no Esowo, á jo kpili ana á bahke jo wuk Nde tib go erem bi á jo nyehn.‡

⁹ Eji á ma mal go nseenga nseenge, owo á kehm fere jol ana esi ebgbá bi eltahre ni li go njinanjini kpo lohng ka ane ba kp-e wuku,§

¹⁰ ye ji Esowo m-e lung re á jol ntubesi abalimajom ana Melkisedek jolo no.

Erehke ji li bade ane ba kil elkahne

* 5:5 5:5 Jon 7:28; 12:49 † 5:7 5:7 Luk 22:41-44 ‡ 5:8 5:8 Fil 2:8 § 5:9 5:9 Elt 5:32

¹¹ Nsol nyia tvv, nyi e bahke bungu bade eyaame jia, nyi kp'riidi go ellennge, eji m ma jol alakatung ane.

¹² Ngare nyia a, kehn wahn ebtiki jol at'tibi, wo anv, n kp'kpeke sebe nne no bahk-n tibi ag-bokombang nsol nya alum Esowo. N kpi nnyabe nnyabe abel, kehn nyi m ma kehme nsol alehke nyi kp'tahne li.*

¹³ Nne awohng awohng no kp'yabe abel, á kpeke li mmon elbili, á nehme kahn alum Esowo antahng, nya kpo tib nne ana á bahke lehke eno go esamahr bi Esowo. Á kpo lim aji aji.†

¹⁴ Nsol alehke nyi kp'tahne li ka ane ba ma gbal, ba ma kpili, ma kpuuru bo, bo ji ma kahn go bo a ntim ji kp'nobo, fere kahn ji kp'sabe.‡

6

Erehke ji li bade elgboko lohng go abo nya Esowo

¹ Fvfo, nobo re wahr yake agbokombang nsol nya Kraist go eltibi, fere soro asi, eji e l'gbal, k'kpe sa go nnahb ekahme, k'kpe jo tib bade ana nne bahke senngge njahm go nsol nyi ki lohng ejumjum,* fere taame tv Esowo,†

² k'kpe jo tib bade awohngalahb,‡ a abo akunu,§ a elnyahme go elkv, a elam ji Esowo bahke lame abi ane, bo nyehn erem go njinanjini.*

³ Ano wo e bahke limi, Esowo l'taame.

* **5:12 5:12** 1 Kor 3:1-2 † **5:13 5:13** Ef 4:14 ‡ **5:14 5:14** Fil 1:10
 * **6:1 6:1** Gal 2:16 † **6:1 6:1** Jems 2:8 ‡ **6:2 6:2** Rom 6:3-8
 § **6:2 6:2** Elt 13:3 * **6:2 6:2** Jon 5:28-29

⁴ Anv, ane ba wuku wuku jolo go ellennge ni Esowo, ba ma gbo, lohng go abo nya Esowo, bo bahke limi renan, kehm feere, kpe ba gbo ndon? Bobwuungu ayare nya lohngo go ejahbetul, fere bel etohko ji Esowo, a aneb Esowo.

⁵ Bobwuungu nnoobo nyi alum Esowo kpi no, a nsahm nyi Esowo bahke tibi go eying ji kp'bake.

⁶ L'fere jol ano, bo kehm gboko, lohng go abo nya Esowo, bo nehm kpe ma feere, ba gbo ndon.† Tibre bofono antahng kp'kumu Mmon Esowo go ekros, fere rik-e ndon go elkab ane.

⁷ Esowo kpo fuulu ndi nyi kpo wo elahb ji kpo na nkpel tvv, nyi kpo lim nsol gbal, fere jo kak ane ebo, nyi wahnge bo ja edi ndi jio.

⁸ Akpiri l'fere mahng edi ndi jio, a agasame, lohngo re, edi ndi jio nobem. Ebsa ntiil Esowo su edi ndi jio, es'kohro, á gohro jahm fi.

⁹ Akpondahme enyame, jol afi e bungu ana, e kp'sahb k'kahn re, wahn ba kpi nsol nyi ga nob, nyi li ka eltahre enahne.

¹⁰ Esowo li etingi nne. Á nehm yini eltum enahne ni n kp'limi, a elgoro ni n tibi no, ni mbing enye kp-n koro, eji n jo loko aneb Esowo, jol anv, n kpi nlimi nlimi ano.

¹¹ Jo sahb kor-r kor re, nne awohng awohng ewahne soro asi ano, jo nok go eltimtim anehng, eji n l'bel ekunukpu ji n l'k'tiki faabe tete rehng es'kohro.

¹² Kana jo gbo ewon! Jo leemen eljini ni ane ba taame no, fere jo kpuumu, ni wahnge bo bele nsol nyi Esowo nyame tong bo.‡

† 6:6 6:6 Hib 12:16-17 ‡ 6:12 6:12 Jems 5:10-11

Enyam bi Esowo lohko li go etingitingi

¹³ Eji Esowo nyame enyam tong Ebrahim, eji á ki bel nne no gbale sehng-e, no kehn á jol-e tiri, á kehm tiri elne re,

¹⁴ “Etingitingi, m bahk-a fuulu, fere lim et'tohngo eja rur.”

¹⁵ Owo Ebrahim kehm kpooro, kehm lohko bel ji Esowo nyame no tong-e. §

¹⁶ Nne l'kehm tiri, á kpo tir nne no gbale sehng-e. Nne l'tir ano, lohngo re, nfaabe kpee ebmal, ellum ene bahke lohko yiimi.

¹⁷ Ano wo Esowo tob tir budu go ege enyam bi á nyame no, eji á sebe re á tib ane ba á nyame tong bo go mbang nyi bo l'k'kpe ma faabe re, á nehm yaange ji á toobo no.*

¹⁸ Eji Esowo kil jo kim efahnge, owo wahnge á ka-r nsol ebal nyio nyi l'k'tiki yaange, nyi li egburu ekakeltim ejahre, wahr jia ji ma be, song yel eju go ege, fere tub ekunukpu ejahm, ji e ma yehke kunu go nsol nyi kp'bake go es'song. †

¹⁹ Ekunukpu jia li ana eronron nlehke mi ma jabbe atohko enyahre, eji l'k'fab tahm, mi bo kahne go njahm ekpiki nyehko edi ji sahb b'bar, ‡

²⁰ edi j'nehm o ji Jisos gbo mbang yel tib go egahre esi, ye ji ma jol ntubesi abalimajom go njinanjini ana Melkisedek jolo no.

7

Melkisedek

§ 6:15 6:15 Rom 4:17-25 * 6:17 6:17 Jems 1:17 † 6:18 6:18 1 Kor 15:19; 1 Jon 3:2 ‡ 6:19 6:19 Hib 8:2; 9:3,7

¹ Melkisedek jia jolo ntul no Salem, fere jol nlimajom no Esowo bi gbale sehng. Eji Ebrahim jo kehng ehta bi á song nok a atul bao, sehng bo, Melkisedek kehm song kpir-e, fere fuul-e.

² Ebrahim kehm-e kake eltahme go nsol kpee.

Go ngbokambang, Melkisedek lohngo re, “Ntul no li go etingitingi.” Á tob jolo “ntul no Salem” ji lohngo re, “ntul no elkoono.”

³ Á belem nde, a nnyehn. Jol nwer nyi et'tohngo eje limm. Jol e wukem bade ana bo jel-e no. Jol ana á kpo no, e wukem. Ye wo foongo Mmon no Esowo.* Á bahke jolo nlimanjom ano ano go njinanjini.

⁴ Nyehnen ana á jolo nj'joka nne. Ebrahim nso ejahre ka-e eltahme go nsol nyi á ko go ehta.†

⁵ Abone Livai ba jolo abalimajom, Esowo tongo bo re, bo jo ko eltahme ana atahm nya Moses bungu no goji abonanyehn, jol eji abonanyehn bao tob lohng go et'tohngo ji Ebrahim.

⁶ Melkisedek lohngem go et'tohngo ji Livai. Wo, á k'ko eltahme goji Ebrahim, fere fuul-e, Ebrahim ji Esowo nyame enyam tong-e re á bahk-e fuulu.

⁷ Nne no kpo fuulu wo ga gbal sehng nne no á fuul-e no, jol nfaabe anyehng anyehng limm.

⁸ Bade eyaame ji abalimajom, bo ji bahke kpoko na, bo ba li ane ba kpo ko eltahme. Wo, eyaame ji Melkisedek ji ko eltahme, ye wo nwer Esowo yiim-e ntianse re, á li go elkpín.

* 7:3 7:3 Jon 8:58 † 7:4 7:4 Jon 3:1-2; Mak 5:22

⁹ Jol nne li ma bung re, yefono Livai ji jo ko eltahme, tob ka eltahme ngare nyio nyi Ebrahim ka Melkisedek eltahme.

¹⁰ Tibre ngare nyi Melkisedek song kpiri Ebrahim, Ebrahim ka gare ana á bahke jele Livai.

¹¹ Atahm nya abone Israel ko no tokko go eltum ni abalimajom. Li re eltum ni abalimajom bao ba lohng go et'tohngo ji Livai jolo go nseenga nseenge, kehn jolem kpe jol re nlimanjom noko kpe lohng ba ana Melkisedek.‡ Nlimanjom noo limm ana Eron jolo no.

¹² Wo, l'fere jol re, eltum ni abalimajom ebyaange, atahm bahke tob yaange fvfo.

¹³ Tibre Jisos ji bo bungu nsol nyia bada ne lohng go et'tohngo jindiki ji nne awohng awohng kala j'jol nlimanjom.

¹⁴ Nne awohng awohng kp'kahne re, Jisos Ntul ewahre lohng go et'tohngo ji Juda, ji Moses ki gahm egahmegahme eji á jo bung bade abalimajom.§

Nlimanjom no nfenfe

¹⁵ Jia ebkpe sahb l'lennge na budu, eji nlimanjom nondiki ma lohng ba ana Melkisedek,

¹⁶ no ki jol nlimanjom tib go eyaame ji et'tohngo ana atahm bungu no. Á jolo nlimanjom go nsahm nyio nyi elkpin ni li go njinanjini.

¹⁷ Tibre nwer Esowo yiimi ntianse ka-e re, “A li nlimanjom go njinanjini ana Melkisedek.”

‡ 7:11 7:11 Rom 3:20; Gal 3:19 § 7:14 7:14 Mat 1:2

18 Ak'kulu atahm bobgbake bum go nkpe, tibre nsahm kpimm, ejumjum lohngem.

19 Atahm nya Moses maam lim ejum ajehng ajehng jol go nseenga nseenge. Anv, wahr ebbel ekunukpu ji ga nob, ji kpo wahng e jeere kohlo Esowo.*

20 Esowo tirem, eji á limi abon Livai, bo jol abalimajom, wo, go eyaame ji Jisos, Esowo t'tir.

21 Eji Esowo tiri no, á kehm-e tongo re,

“Jehova ebtir,

á nehm yaange ntir atahng enye,

‘A li nlimanjom go njinanjini.’ ”

22 Owo wahng Jisos ma fere jol nne no ma wahng egbanngalung ji ga nob ma yiimi.†

23 Abalimajom bako jolo go egom, tibre bo jo kp'kpo. Bo joom kpe ma soro asi go bo eltum.

24 Wo, Jisos li go elkpin ni li go njinanjini. Eltum ene ni njom alimi, nnene limm, no bahke koko nji enye.

25 Owo wahng ngare anyehng anyehng á kpo mal jo tahre ane ba kpo sehng go ege, rehng goji Esowo, tibre á li go njinanjini re á jo gboongo Esowo ka bo.‡

26 Elkohn nlimanjom noo wo fuumu a nahre, ye ji li saang, egahme á kpimm, elem ajehng ajehng we limm. Á jolem nne abiafem, á jolo eje eje. Bo rod-e bum wahre wahre sehng ejahbetul Esowo sa.

27 Á limm ana abalimajom bako. Limm re á jo lim ajom efung abehng abehng, tohko jo gbo mbang lim njom nyio nyi abiafem enye, fere tob

* 7:19 7:19 Elt 13:38 † 7:22 7:22 Luk 22:20 ‡ 7:25 7:25 Rom 8:34; 1 Jon 2:1

lim nyi abiafem nya ane bako.§ Á limi njom nkpelkpel anyehng eji á yake elne ka.

²⁸ Atahm nya Moses yehke ane ba ki li go nseenge re bo jol atubesi abalimajom. Wo, alum nya Esowo tiri no,* ngare nyi Moses ma tohko ka atahm, nya nya yehke Mmon no bo m-e lim á ma jol go nseenga nseenge, fere jol go njinanjini.

8

Egbanngalung ji nfenfe

¹ A wo li ejum ji wahnge e kpo b'bung. Nyehnen elkohn nlimanjom no e kpi no, ye ji jehk go ejang eboblum bi eti etul ji Esowo bi nnen a nnen go ejahbetul Esowo.

² Á kp'loko go edi ji sahb b'bar, ji li go etingitingi ebkpatahk Esowo ana ntubesi abalimajom, ebkpatahk bio bi Jehova si antahng, bi ki li nne si no.

³ Nlimajom awohng awohng bo yehk-e na re á jo ko ayare song ka Esowo, fere jo lim ajom. Owo fvfo nlimanjom ewahre bahke tob bel ejum ji á bahk-e kake.*

⁴ Li re á li go njini, kehn á jolem jolo nlimanjom ejololo,† eji abalimajom li na, ba kp'koko ayare song ka Esowo ana atahm bungu no.

⁵ Ebkpatahk bi bo kp'limi eltum li ana ntugare, fere li go elfoongo ni ebkpatahk bi li go ejahbetul Esowo.‡ Ngare nyi Moses yahke si ebkpatahk bio, owo Esowo kehm-e tubu elle re, “Kunu ekpu, eji

§ 7:27 7:27 Hib 5:1-3 * 7:28 7:28 Hib 6:17 * 8:3 8:3 Hib 9:12

† 8:4 8:4 Hib 7:14 ‡ 8:5 8:5 Kol 2:16-17

a l'lohko lim ejum ajehng ajehng jang jang ana n tib-a no go ewong.”

⁶ Anv, Kraist ebbel eltum njom alimi ni ga nob. Fvfo, egbanngalung ji ye li nkonambum, ji ji ga nob, tibre egbanngalung jia kun go enyam bi Esowo nyame no, bi ga nob. §

⁷ Li re ngbokambang egbanngalung jolo go nseenga nseenge, kehn Esowo jolem kpe seb re á kpe lim etoono jehko.

⁸ Tibre Jehova nyehne re, ane ebe limm go nseenge, owo wahnge á kehm bungu re, “Afung kp'bake nya m bahke tuungu lim egbanngalung ji nfenfe a abone Israel, a et'tohngo ji Juda.

⁹ Nehm jol ana egbanngalung ji n limi a babnde ebo efung bio bi n jabbe bo go ebo, yehke bo go ndi nyi Ijib. Eji bo tene egbanngalung ji n limi a bo, owo wahnge n ki kpe jo kpur bo. Alum nyaa Jehova wo bungu.”

¹⁰ Jehova kehm kpe bung re, “Egbanngalung ji a, ji m bahke limi a abone Israel afung nyao l'sehng. M bahke kake atahm enyame go bo a ntir atahng, fere nyon go bo a ntim. M bahke jolo Esowo ebo, bo bahke jolo ane ebame.*

¹¹ Nnene limm, no bahke jo tib nne ebjing ewe, fere jo tong mmonannyehn re, ‘Kahn Jehova!’ Tibre bo ane kpee bahk-m kahne, bomo abonse tete ba rehng aj'jok ane. †

¹² Tibre bo bahk-m fili ndon tib go bo a nsoodo.

§ 8:6 8:6 Hib 6:17 * 8:10 8:10 Hib 10:16-17 † 8:11 8:11 1 Jon 2:20,27

N nehm kpe tiki buumu abiafem ebo.”

¹³ Eji Esowo jo bung bade egbanngalung ji nfenfe, eblohng re, yebrod ngbokambang egbanngalung bum ana nk'kulu ejum.[‡] Ejum ji ma kehme elkulu, ngare nyi ma gohro kul, bahke gulu eltane.

9

Ana bo jo loko Esowo mahne mahne

¹ Go ngbokambang egbanngalung, atahm j'jol nya jo tib ana bo bahke jo kak Esowo. Edi tob jolo o, ji bo jo kak Esowo, ji ane limi no.

² Tibre bo si ebkpatahk. Go ngbokambang ekp'kpa wo, bo bumu enyaale, a ekp'kuru, go abred nya bo jo lim bum go esamahr Esowo. Edi jio, bo jo lungu re mbarebare edi.

³ Edi ji jolo go njahm etoono ekpiki jehko,* bo jo lungu re edi ji kp'sahb b'bar.

⁴ Owo ekpingi ji bo limi go agul jolo no, ji bo jo kak insens, a elkohl ni egbanngalung, ni bo nyane agul wohng bulu kpee. Ekpingi agul ji mmanna woomo go atahng, woomo atahng elkohl nio, a ebti bi Eron bi kake anyane, a atal abal nya Esowo nyono atahm nya egbanngalung.

⁵ Enjel na ebal nyi jo tib ellub ni Esowo kuumu go mbulu elkohl, nyi Esowo jo tahm ka ane go bo abiafem. Bo nyange akpungkpung ebo bulu edi jio ji eltahmeka. Anv, e nehm ma ji, tooro ejum ajehng ajehng kpee.

[‡] 8:13 8:13 2 Kor 3:11,13 * 9:3 9:3 Mat 27:51

⁶ Ana wo bo jo toobo ejum ajehng ajehng bum. Ngare anyehng anyehng abalimajom jo yele ekp'kpa re bo song lim eltum ebo.

⁷ Ntubesi abalimajom wo wo jo yel nkimi nyi sahb b'bar nkpel anyehng go elya. Á joom tiki yel, k'fili alung njom ma abiafem enye, a nya ane.

⁸ Nsol nyia, Etingi Etohko kp-r tibi re, mbang ka lennge nyi nne bahke sehng rehng nkimi nyi sahb b'bar,[†] eji ekp'kpa kpeke li,

⁹ ji kp'tibi bade eying jia ji anv, ji ane kpo ka ayare, fere jo lim ajom ka Esowo nya l'k'ma lim nne no kp'limi ano eltim ene jol saang go esamahr bi Esowo.[‡]

¹⁰ Elloko ni bo jo loko Esowo go nsol alehke, a nsol elwoko, a ajoobo abang nya bo jo ru elbo, nya nya li atahm nya li ka ngubjing. Esowo ka bo atahm nyaa re bo jo bum tete ngare rehng nyi á bahke tuungu nsol kpee.[§]

Alung ma jisos ma kpo ru eltim nne

¹¹ Anv, Kraist ebba ana ntubesi abalimajom no anoobo nsol nya kp'bake. Ebkpatahk bi á kpo lim eltum bi bi ga gbal, fere n'nob. Tibre ane sang si go ebo. Limm ka njini nyia.

¹² Kraist yele edi ji sahb b'bar nkpelkpel anyehng, fere sa o.* Eji á yele no, á koom alung ebul, a alung abon efong. Á ko alung mame yefono antahng, yel a ma, fere fak-r yake go njinanjini.

[†] 9:8 9:8 Hib 10:19-20 [‡] 9:9 9:9 Jon 15:3; 1 Jon 1:7 [§] 9:10 9:10 Gal 4:1-4 * 9:12 9:12 Hib 7:27

¹³ Alung ebul, a alung efong, a atong mmon a nfong no bo m-e jahm fi, bo jo ko madde ane ba ki li saang, bo fere jol saang go bo a ngubjing.

¹⁴ L'jol ano, anv, alung ma Kraist sang bahke ga ru ntir atahng enyahra, eji e l'yake nsol nyi ki lohng ejumjum, fere jo loko Esowo bi li go elkpina?[†] Tibre á yake elne ka Esowo ana ejum njom ji ki kpi elem ajehng ajehng, tib go nsahm nyi etohko ji li go njinanjini.

¹⁵ Esi jia ji wahnge Kraist li nkonambum no egbanngalung ji nfenfe,[‡] eji ane ba Esowo ma lung bo l'bel ejum elehke elkv ji li go njinanjini, ji Esowo nyame no. Tibre elkv j'jol ni fake ane yake go abiafem nya bo jo lim ngare nyio nyi ngbokambang egbanngalung.

¹⁶ Nne l'nyon nwer ngare nyi á yahke ba elkpoko kak go elkohl, lohngo re nne noo bahke tohko kpo, ejum ajehng ajehng kehm jolo.

¹⁷ Tibre nwer nyi á nyono kak go elkohl lohngem ejumjum, eji á kpeke li go elkpin. Ngare nyi á ma kpo, owo bahke kehm jolo ana á nyono no.[§]

¹⁸ Ki li re alung ma, kehn ngbokambang egbanngalung jolem yiimi.

¹⁹ Tibre, eji Moses bungu ellum anehng anehng ni atahm tong ane, owo á kehm koko alung ma abon efong, a ma ebul, jo ko alahb, a abilibili av, a isob, madde go nwer atahm nyio, fere madde ane kpee,

²⁰ kehm bungu re, “A wo li alung ma egbanngalung ji Esowo tong-n re wahn jo bum atahm

[†] 9:14 9:14 1 Pit 1:18-19 [‡] 9:15 9:15 1 Tim 2:5 [§] 9:17 9:17 Rom 7:2-4

enye.”

²¹ Mbang ny'nehm nyi Moses tob madde alung go ebkpatahk, a nsol kpee nyi bo jo ko loko Esowo.

²² Etingitingi, ka riki ejum ajehng ajehng bo jo ko alung, lim bar. Ki li re alung ma, kehn eltahmek a go abiafem limm.*

Kraist kpo nkpelkpel anyehng tib abiafem

²³ Nsol nyia nyi li go elfoongo ni nsol nyi li go ejahbetul Esowo tikem bar,† sehngem re no, bo limi re bar go mbang nyia. Wo, atingitingi nsol nya ejahbetul Esowo kp'sebe ajom nya ga nob sehng ajom nyako.

²⁴ Tibre Kraist yelem go mbarebare ebkpatahk bi ane si go ebo, bi li go elfoongo ni etingitingi ebkpatahk. Á yele go yefono ejahbetul Esowo re á song yiimi go esamahr bi Esowo, fere jo gboong-e ka-r.‡

²⁵ Ntubesi abalimajom no Jus jo yele edi ji sahb b'bar a alung ma ki li mame nkpel anyehng go elya anehng anehng. Wo, Kraist yakem elne ka nkpel a nkpele.

²⁶ Jolo jol ano, kehn á jol nyehne erem nkpel a nkpele bomo go ngare nyi Esowo limi njini nyia. Wo, ano limm. Nkpel anyehng nyi á lohngo no ba es'kohro ngare nyia a,§ eji á l'tane abiafem tib go njom nyi á limi no ngare nyi á yake elne ka.

²⁷ Ana nne awohng awohng bahke kpoko nkpelkpel anyehng, kehm song yiimi go eti elam ji Esowo,

* 9:22 9:22 Ef 1:7 † 9:23 9:23 Hib 8:5 ‡ 9:24 9:24 1 Jon 2:1

§ 9:26 9:26 1 Kor 10:11

²⁸ ano wo fvfo Esowo ma rod Kraist ka ana ejum njom nkpelkpel anyehng, eji á l'sol abiafem nya ane gbalee.* Á bahke kpe ba, ba tahre ane ba jehk kp-e siki.† Á nehme kpe ba tib go abiafem.

10

Atahm li go elfoongo ni atingitingi nsol

¹ Atahm nya Moses li go elfoongo ni anoobo nsol nya kp'bake, yefono nsol nyio sang.* Ajom nyanehm nya Jus kpo lim elya elya. Owo wahnge atahm l'k'ma lim ane ba kpo jeere kohlo Esowo, bo jol go nseenga nseenge go ege esamahr.

² Jolo jol ano, kehn bo jol rahke ajom alimi. Li re ane ba jo kak Esowo b'bar, go bo abiafem nkpelkpel anyehng, kehn Esowo nehme kpe buumu bo abiafem ebo.

³ Wo, ajom nyao nya kpo buumu bo abiafem ebo elya elya.

⁴ Tibre alung efong, a ma ebul nehm ma tiki ru eltim abiafem.

⁵ Owo wahnge ngare nyi Kraist yahke ba go njini, á tongo Esowo re,

“A kpehme seb ajom, a ayare.

A toobo ngubjing bum-m.†

⁶ Ajom nya bo kpo jahm nsol fi,
a ajom nya bo kpo lim, eji abiafem l'laade bo, wa kpehme kor.‡

⁷ Owo n kehm bungu re, ‘Nyehn me gana, o Esowo, me m ba re me m ba lim ji kp-a

* **9:28 9:28** Mak 10:45 † **9:28 9:28** Jon 14:3 * **10:1 10:1** Hib 7:19; 8:5 † **10:5 10:5** Rom 8:3 ‡ **10:6 10:6** Mat 9:13

koro, ana bo nyono bada name go nwer
Esowo.' "§

⁸ Á tohko bung re, "A joom seb ajom, a ayare, a ajom nya bo kpo jahm nsol fi, a ajom nya bo kpo lim, eji abiafem l'laade bo. Nsol nyia wa joom kor." Á bungu ano, jol eji bo jo l'lim ajom nyao ona ana atahm bungu no.

⁹ Owo á kehm kpe bung re, "Anv, me m ba re me m ba lim ana ji kor-a no." Jia lohngo re, Esowo ebrange agbokombang ajom fere bum nyi Kraist.

¹⁰ Tib eji Jisos Kraist limi ji koro Esowo, owo wahnge e ma bar go egahre abiafem kpee tib go njom nyi á yake ngubjing enye ka nkpelkpel anyehng.

¹¹ Nlimajom awohng awohng kpo yiimi, jo lim eltum ene efung abehng abehng, jo lim ajom nyanehm nkpel tvv, nya l'k'ma ru eltim abiafem.

¹² Wo eji Kraist ma lim njom anyehng nyi li ano ano go njinanjini tib esi abiafem, owo á kehm jehke go ejang eboblum bi Esowo,

¹³ kp'siki tete Esowo lim anebekv ebe, bo jol etikunakpade eje.

¹⁴ Tibre go njom nyio na anyehng nyi á limi no, nyi nyi á ma lim ane re bo jol go nseenga nseenge, fere jol ano go njinanjini, bo ji ma bar go bo abiafem.*

¹⁵ Etingi Etohko kp-r tob yiimi ntianse. Tibre á gbo mbang bung re,

¹⁶ "A wo li egbanngalung ji m bahke limi a bo.

§ 10:7 10:7 Jon 6:38 * 10:14 10:14 Rom 5:18-20

Afung nyao l'sehng, owo m bahke kake bo atahm enyame go bo a ntim, fere nyon go bo a ntir atahng. Ana wo Jehova bungu no."

17 Owo á kehm kpe bung re,
 "N nehm kpe tiki buumu abiafem ebo ebuumubu-
 umu,
 a abi nsol nya bo jo lim."

18 Eji ane ma si b'bel eltahmek a go nsol nyio, njom anyehng anyehng kpeem li, nyi bo bahke kpe lim tib esi abiafem.†

Eltaame, a ekunukpu, go elkoro

19 Owo fvfo abonanee, e kpi esahb ji e bahke ma yel ebkpatahk bio bi Esowo, sehng song yel edi ji sahb b'bar tib alung ma Jisos.

20 Á lennge mbang nyi nfenfe go ekpiki ka-r, nyi li mbang nyi elkpin. Ekpiki jio, ngubjing enye nyi.‡

21 Ana e kpi egburu nlimanjom no kp'fili etahk Esowo,

22 nong, wahr jeeren kohlo Esowo a eltim anehng, a eltaame ni e kp'bumu Esowo go etingitingi, a agubjing enyahre nya bo ma-r wohngo alahb ma kp'wili, a ntim nyi kil jo ka-r ebi, tib eji bo ma-r ru go alung ma Kraist.

23 Nong, wahr yiimi t'tahne go ntianse ayiimi ka ekunukpu ejahre, k'gbiingi elnahre. Tibre ye ji ma nyam tong-r, fuumu re wahr bum-e go etingitingi.§

24 Nong, wahr jo tiren ana e bahke jo melle atemtem, eji e l'jo tib elkoro, fere jo lim nnoobo.*

† 10:18 10:18 Hib 8:10-13 ‡ 10:20 10:20 Mat 27:51; Hib 9:24

§ 10:23 10:23 Rom 4:20 * 10:24 10:24 2 Kor 9:2

²⁵ Nong, wahr k'jo yaange akon enyahre,[†] ana egom jindiki kpo kono ellimi, wahr jo kaken na atemtem ntim, gohro t'tong ngare nyia nyi ń kp'nyehne re, efung bio bi Ntul kp'kabbe abake.

Erehke ji li bade elam ji kp'bake

²⁶ Eji e ma bel elkahne ni etingitingi jio, fere kp'limi abiafem go elrang, njom anyehng anyehng nyi bahke ruku ntim enyahre, laade abiafem nyao kpeem li.[‡]

²⁷ Ji ma sa li re, elfahle ni e jehk a ni kp'siki elam, a amennge agun nya bahke fehke anebekv ba Esowo.[§]

²⁸ Nne awohng awohng no l'gbo ntahm nyi Moses, bo bahk-e wulu, eji ane abal, ane ara ma yiimi ntianse. Jol ndon anyehng anyehng bo nehm be.

²⁹ Anv, ń kp'tiri renan? Elkohn erem abi bahke fuumu a nne no l'kadde Mmon no Esowo go akpade, fere rod alung ma egbanngalung ji Esowo bum daange daange daange, ma m-e lim, á ma bar, fere su etohko jio ji nnoobo nyi Esowo?*

³⁰ Tibre e kp'kahne nne no bungu re, “Me wo li mb'bongo. Me wo li nt'tuuru.” Á kpe bung re, “Jehova bahke lame ane ebe.”[†]

³¹ Li emennge ejum sehng re nne gbo yel go abo nya Esowo bi li go elkpín.[‡]

Erehke ji li bade ana nne Esowo bahke jo kpuumu

[†] **10:25 10:25** Mat 18:20 [‡] **10:26 10:26** Hib 6:4-6 [§] **10:27 10:27**
² Pit 2:4 * **10:29 10:29** Mak 3:29; Jon 16:9 [†] **10:30 10:30** 1 Pit
 4:17-18 [‡] **10:31 10:31** Hib 12:29

³² Buumen ana ń jolo wuku wuku, eji ń bele ellennge ni Esowo, ana ń jolo go etahntahn ngare, jo kpuumu erem.

³³ Nkpel nyindiki bo jo su-n go elkab ane, fere jo nohk-n. Wahn ebjol ana ane bako ba kp'tob nyehn erem ano.Š

³⁴ Tibre aneb agbekobo jo fil-n ndon. Jol eji bo taar-n taare nsol enyahne go eko, ń yake na go eyebatahng ka go, eji ń kp'kahne re, wahnfono antahng kpi nsol nyi ga nob, nyi bahke jolo go njinanjini.*

³⁵ Kana yake Esowo abumu go etingitingi! Tibre bahke kake nne egburu eltuuru.

³⁶ Nobo re wahn jo kpuumu, eji ń l'mal lim mbang nyi Esowo, fere bel ji á nyame no.

³⁷ Ana nwer Esowo bungu no re,
“Bahke kpe kang ntiil, nne no kp'bake kehm bake. Á nehm laange.”†

³⁸ Edi nwer Esowo jehko kpe bung re,
“Etingitingi nne bahke bele elkpín tib go ege eltaame.‡
Wo, á l'jeere, feere njahm, eltim m-e nehm kpe yebe tob-e.”

³⁹ Tibre wahr limm ane ba kpo feere njahm, fere ranngé. Wahr ane ba ma taame, fere bel eltahre ba.

11

Bade eltaame

Š **10:33 10:33** 1 Tes 2:14; 2 Tes 1:4 * **10:34 10:34** Mat 6:20; Luk 12:13-15 † **10:37 10:37** 2 Pit 3:9 ‡ **10:38 10:38** Rom 1:17; Ef 2:8

¹ Eltaame li elkahne ni nne ma sahb k'kahn re, á bahke bele nsol nyi á kp'kunu ekpu, fere kahn re, nsol nyimongo nyi á kil ma nyehn lohko li go etingitingi.*

² Eltaame ni wahnge Esowo jo fa ane ba mahne mahne nnyo.†

³ Eltaame ni wahnge e kpo kahn re, Esowo tohko bung ellum ene, nsol kpee kehm jolo.‡ Lohngo re, Esowo ko ji nne kil nyehne, lim nsol nyi nne kp'nyehne.§

Ebel, Enohk, Noa

⁴ Eltaame ni wahnge Ebel limi njom ka Esowo nyi ga nob sehng nyi Ken. Eltaame ene ni wahnge Esowo fa-e nnyo re á lohko jol etingitingi nne, eji á ko njom ny'nye. Eltaame ni á taame tv Esowo ni wahnge á kpi mbungu mbungu a nahre, jol eji á ma kp'kpo.*

⁵ Eltaame ni wahnge Enohk ki kpo. Esowo rod-e tahm a ne go ero. Bo we kpeem tiki nyehn, tibre Esowo rod-e rod tahm a ne. Nwer Esowo bungu re, “Re Esowo kehm rodo Enohk tahm a ne, Enohk jo limi ji jo kor Esowo.”

⁶ Tohko tiki jol eltaame, nnene limm, no bahke ma lim ji bahke jo kor Esowo. Tibre nne awohng awohng no l'seb re á jeere kohlo Esowo, á bahke taame re, Esowo bia, lohko li, á kpo tuuru ane bao ba kp-e sebe.

⁷ Eltaame ni wahnge Noa wuku erehke ji Esowo kak-e bada nsol nyi kp'bake, nyi á ki nyehn go

* 11:1 11:1 2 Kor 5:7 † 11:2 11:2 Rom 4:3 ‡ 11:3 11:3 2 Pit 3:5

§ 11:3 11:3 2 Kor 4:18 * 11:4 11:4 Mat 23:35; Hib 12:24

amahr. Eji Noa ma wuk erehke jio, á kehm kehme elfahle. Owo wahnge á kono egbang bi bahke tahre ane ebe. Eji á ma lim ano, á ka njini ebi,[†] ye li eno ji Esowo, ji nne bahke lehke, á l'taame.[‡]

Ebrahim, Aisik, Jakob, a Josef

⁸ Eltaame ni wahnge Ebrahim wuku Esowo, eji á tong-e re, á lohng song go edi ndi ji á bahk-e kake ana ejum elehke elkv. Á kehm lohngo go ege ejahbe asongo. Á joom kahn edi ji á fi fi. §

⁹ Eltaame ni wahnge á song lene go edi ndi ji Esowo nyame no tong-e re á bahke bele. Ebrahim, bo lene o ana ajahmjahm, jo kang go nkpatahk, a Aisik, go Jakob, bo ji Esowo nyame tong bo re, bo bahke lehke elkv n'nehm ni Ebrahim.

¹⁰ Tibre Ebrahim jo siki ejahbe ji Esowo toobo no, fere lim, ji kpi nnahb ekahme.*

¹¹ Eltaame ni wahnge Sera bele nsahm nyi á sa ela, jol eji á kulu kul sehng ngare nyi, kehn á jol jele. Tibre á bumu nne no nyame no tong-e go etingitingi.

¹² Fvfo, go et'tohngo ji Ebrahim ji tob jol nne no ma kul sehng go mmon ajele wo, ane gbalee lohngo no, ba ruru ana alonlo, a erikehndi bi li go aya, bi nne l'k'ma fange.

¹³ Ane bao kpee kp'kpo a eltaame eltaame ebo. Bo belem ji Esowo nyame tong bo. Bo jo nyehne na fee,[†] fere jo kak Esowo nnyo go ejum jio, fere

[†] 11:7 11:7 Mat 12:41-42 [‡] 11:7 11:7 Mat 24:37-39; 2 Pit 2:5
 § 11:8 11:8 Mat 4:20; Jon 21:18 * 11:10 11:10 Ell 21:2 [†] 11:13
 11:13 2 Kor 5:7; Rom 4:19-22

jo taame re, bo ajenne nya, a ajahmjahm go njini nyia.‡

¹⁴ Ane ba kpo bung ana, bo kp'tibi re, bo kp'lohko seb ejahbe.

¹⁵ Li re Bab Ebrahim jo tiiri bade ejahbe ji bo lohng no, kehn bo jol ma feere. Tibre eyake j'jol ji elfeere.

¹⁶ Bo kp'sebe na ejahbe ji ga nob, ji li go ero. Fvfo, Esowo nehme nyaare bo. Yebtaame re, bo lung-e re Esowo ebo. Tibre yebtoobo ejahbe bum bo.

¹⁷ Eltaame ni wahnge Ebrahim yake mmon ewe ka ana ejum njom, ngare nyi Esowo wuung-e no. Á toobo ebjing re á yake mmon ewe na awohng aw'wohng ka,

¹⁸ no Esowo nyame enyam tong-e bada ne re, “Ane ba bahke lohngo go ega et'tohngo bahke lohngo go eyake ji Aisik.”

¹⁹ Ebrahim bumu re, Esowo bahke ma nyahme ane go elkv. Owo wahnge Esowo kehm feere a ne ka-e ana ejum ntugare.§

²⁰ Eltaame ni wahnge Aisik tongo Jakob abola Eso re, bo bahke bele elfuulu go ngare es'song.

²¹ Eltaame ni wahnge Jakob biri elfuulu ni Esowo tv abone Josef na abal ngare nyi á yahke ba elkpoko. Á gongo feere go ege esi ebtifilibo, fere tonngo o, kak Esowo.

²² Eltaame ni wahnge Josef bungu ngare nyi á yahke ba elkpoko bade ana abone Israel bahke lohngo go Ijib, fere tong bo ana ji bo bahke limi a ekv eje.

‡ 11:13 11:13 Jon 17:14-16 § 11:19 11:19 Rom 4:17

Moses, a Josua

²³ Eltaame ni wahnge, nde, a nnyehn Moses behre Moses go nnyahng era, ngare nyi bo jel-e na jel. Tibre bo nyehne re á jolo mmon no nobo s'sehng. Bo fahlem ntahm nyi ntul jehke no.

²⁴ Eltaame ni wahnge, eji Moses gbale no, á tene re, bo k'jo lung-e re, mmon no mmon a Fero.

²⁵ Á yehke ejang bi aneb Esowo, fere jo nyehn erem a bo. Á sehem re á jo li ebno bi abiafem bi li mmongare ntiil.

²⁶ Á rodo erem esono bio bi Kraist bi á nyehne no bum ana afang nya ga gbal sehng nya Ijib, tibre á yehke ekunukpu eje kpee kunu go eltu-uru.*

²⁷ Eltaame ni wahnge Moses lohngo go Ijib tahm. Á fahlem erakatahng ji ntul. Á jo kpuumu, jol are á nyehne na Esowo bi nne kil ma nyehn.†

²⁸ Eltaame ni wahnge á limi elkak Pasova, fere madde alung, eji nne no kp'bake re á ba wul agbokombang abon l'k'lak bo ebo.

²⁹ Eltaame ni wahnge abone Israel sehng go Abilaya, ano are bo jene na go emahng. Eji anebe Ijib gare re bo tob lim ano, bo kehm tane go alahb.‡

³⁰ Eltaame ni wahnge ekahme ji Jeriko gbo no, eji abone Israel jene senng nfung esehma.§

³¹ Eltaame ni wahnge Rehab nnenkal as'sa ki tob kpo a ane bako ba ki taame tv Esowo, tibre á vvrw ane ba weele ba nyehn ejahbe.*

* **11:26 11:26** Mat 19:27-28 † **11:27 11:27** Elt 7:55 ‡ **11:29 11:29** Jon 12:48 § **11:30 11:30** Luk 17:6 * **11:31 11:31** Jems 2:25

Ane bako ba tob taame

³² Anv, jen ji m bahke kpe bung budu? Ngare m-e limm, nyi m bahke kpe bung bada Gideon, Barahk, Samson, Jefta, Devid, Samuel, a abanyehnamahr,

³³ ba eltaame wahnge no, bo jo nok nta, ga ajahbe nyako. Bo jo limi ji li go etingitingi, fere bel ji Esowo nyame tong bo.† Bo ba gbaange anyo nya agabe.

³⁴ Bo ba lahme agun nya jo nyare. Bo ba be for go elkv ni bo jol wulu bo go ekahngkahng.‡ Bo ba bele nsahm go elleenge ni bo ma leenge,§ fere tahne go ebta anoko, jo ga nsoja nyi ajahbe nyako, fere jo kam bo.

³⁵ Anebkal, akvne ebo jo kpe nyahme, ba tob bo.

Wo, ane bandiki jo nyehne erem bi ebnohko, fere ten re, bo k'yehke bo yake, eji bo l'nyahme go elkv efung bindiki, ba bel elkpin ni ga nob.

³⁶ Ane bandiki jo nyehne erem bi bo jo nyok bo, fere jo dv bo. Bandiki, bo jo gba bo alehke, fere bum bo agbekobo.

³⁷ Bandiki, bo jo tuubu bo atal. Bandiki, bo jo ko ntahme amahn, jo kiimi bo ekpidi ebbal. Bandiki, bo jo wulu bo go ekahngkahng.* Bo jo kake agunyam ejoro, a nya ebul, jo yanng. Bo gbo ekpak, fere woomo go efemfem, bo fere jo nohk bo.†

³⁸ Njini nyia fuumem a bo, tibre bikem a bo.‡ Bo jo yanng go elka emahng, a awong, fere jo

† 11:33 11:33 Luk 2:25-30 ‡ 11:34 11:34 Elt 7:29 § 11:34 11:34
 2 Kor 11:30; 12:5,10 * 11:37 11:37 Elt 7:52 † 11:37 11:37 Mak
 1:6 ‡ 11:38 11:38 Mat 11:11

kang go akpatal, a abing nya li go ndi.

³⁹ Ane bao kpee lohngo elgahm ni nno tib go bo eltaame, jol eji bo ki b'bel ji Esowo nyame tong bo.

⁴⁰ Tibre Esowo ebtoobo ejum ji ga nob bum-r. Bo nehm waka jol go nseenga nseenge, eji e kala jol a bo. §

12

Esowo kpo kak ane ba kpo kor-e erem

¹ Fvfo, eji e kpi egburu ellong atianse ana nia ni yim senng-r kak, nong, wahr tob radden elsol anehng anehng fvfo,* fere laade abiafem nya ma-r sahb l'laake.† Nong, wahr been abahl go ekakesehk,‡ nya Esowo ma toobo bum-r;

² jo soro na asi, jo seenge Jisos, ye ji ekakesehk ejahre tohk-e no, bomo go mbomannahb tete rehng go es'kohro, ye ji erem esono bi bo son-e no ki-e tohko l'lub, á fere kpuumu erem bi ekros tib go eyebatahng ji noongo, jo sik-e, kehm song ji go eboblum eti etul ji Esowo.

³ Jo buumen ye ji ma kpuumu erem bi aneb abiafem jo ko-e ekv, eji l'ki-n jo kpen, n fere jo yini ekpu.

⁴ Go ebta bi n kp'noko a abiafem, § n ka nok tete rehng go elkv.

⁵ Anv, wahn ebyini erehke ji Esowo kak-n no, eji n li abon ebea? Á bungu re,

§ 11:40 11:40 Ell 6:9-11 * 12:1 12:1 Mat 11:28 † 12:1 12:1
Rom 7:21 ‡ 12:1 12:1 1 Kor 9:24-27 § 12:4 12:4 Gal 5:17

“Mmon ewame, ka jo daange erem bi Esowo l'kak-
a.

Nong, eko ki-a jo tan,

Esowo l'nyam-a.*

⁶ Tibre Esowo kpo kak nne no kpo kor-e erem.

Á kpo dv mmon awohng awohng no á l'ko-e.”†

⁷ Jo kpuumen erem bi Esowo kp-n kake. Tibre á kp-n fili ana abon. Anv, mmon awo no nde kil jo kak-e erem?

⁸ Esowo tohk-n kak erem ana á kake abon bako, jia lohngo re, wahn abon nnaahb sang, wahn aju nya.

⁹ Wahr fvfo, e tob bele babnde baka baka ba njini, ba jo kak-r erem, e jo kake bo. Anv, nde no atohko sang e bahk-e ga woomo go elwoa, fere bel elkpina?

¹⁰ Babnso ejahre kak-r erem mmongare ntiil, ana koro bo. Wo, Esowo kpo lim ano, eji l'nob a nahre, e fere jol ejahre ejahre ana ye li no.

¹¹ Ngare erem anyehng anyehng limm nyi nne kpo bel eyebatahng, ngare nyi nne bahke jehke ndon ndon nyi. Wo, l'kang go, ane ba ma kpili, ma kpuuru bo, bahke kabe nkab elkoono nyi li eno ji bo bahke lehke go esamahr bi Esowo.‡

Erehke ji li bade Eso

¹² Kungen abo enyahne nya ma-n kpeere, wahn tob kungu alahng enyahne nya ma lahng.

¹³ Limen mbang nyi toro tor, wahn jo jen, eji ekpade ji ma lohng l'k'demme, l'fere nob.§

* 12:5 12:5 Mat 16:23 † 12:6 12:6 Ell 3:19 ‡ 12:11 12:11 2 Kor 4:17-18 § 12:13 12:13 Mat 12:20

14 Jo noken, eji á l'jo bel elkoono a nne awohng awohng,* wahn fere jol ejahne ejahne. Nne awohng awohng no tohko jol ano, á nehm nyehn Jehova.

15 Jo kunen ekpu, eji nne awohng awohng l'k'sa nnoobo nyi Esowo, eji nlohk eti nyi kp'lulu l'k'yel go ege eltim, fere jo ko ntong ba, toono o, lim ane gbalee jol eltehb eltehb.

16 Jo kunen ekpu, eji nne awohng awohng l'k'bel ebi elkpin, fere jol nne no Esowo kil jo lub-e ana Eso ji gungu nsol elehke elkv enye go ntahma nsol alehke na anyehng.

17 Ní kp'kahne re, eji ma kang, Eso ffeere re á song ko nsol elehke elkv enye nyi jolo elfuulu ni nde, nde kehm-e tene. Mbang kpeem jol ka-e, nyi ndon agboko, jol eji á jo s'seb mbang nyio a abonngo go amahr.†

Wahr ebba goji Jisos

18 Ní ka ba go ewong ji bo kpo lung re Sainai, ji nne bahke ma lak ebo, ji jo lul. Ní ka ba go edi jio ji ejanngé nyake no, ji egburu nfeb jo lim,

19 ji bo wuku ntang, fere wuk alum. Eji ane bao wuku alum nyao, bo kehm jo gboongo re, Esowo k'kpe bung alum nyandiki budu.

20 Tibre alum nyao g'ga bo, nya Esowo tongo bo re, "Jol afi nnyam nyi kooro ewong jio, bo bahk-e wulu atal."

21 Etingitingi, ji ane nyehne no menngé sehng, owo Moses kehm bungu re, "N kp'fahle, fere jo k'kahm."

* 12:14 12:14 Rom 12:18 † 12:17 12:17 Hib 6:4-8; 10:26-27

22 Wo, wahn ebba go ewong ji bo kpo lung re Sayon, ejahbe ji Esowo bi li go elkpín. Wahn ebba go Jeusalem ji li go ejahbetul Esowo.‡ Wahn ebba goji ellong enjel atahl nku a nku nya ma ba kono go elkak.

23 Wahn ebba nkon nyi ane ba bo gbo mbang jel bo,§ bo ji bo ma nyon abing ebo go ejahbetul Esowo. Wahn ebba goji Esowo bi li nne no bahke lame ane kpee. Wahn ebba goji atohko nya atingitingi ane ba bo ma lim bo re bo jol go nseenga nseenge.

24 Wahn ebba goji Jisos ji li nkonambum no egbanngalung ji nfenfe. Wahn ebba go edi ji bo ma madde alung eme ma kp'bungu bada nsol nyi ga nob sehng ma Ebel.*

25 Jo kunen ekpu, eji n l'k'ten nne no kp'bungu. Eji ane bao ki ma be for ngare nyi bo tene nne no jolo go njini, ye ji jo ko alum Esowo, jo ba rehke bo, anv, wahr bahke foro renan, e l'ten nne no kp'bungu a nahre go ejahbetul Esowo?†

26 Ngare nyio ellum ene gbehke njini. Wo anv, yebnyam re, “Nkpel anyehng nyi nyi ma sa, nyi m bahke gohro gbehke njini, jol njini nyi nyi sang, m bahke tob gbehke elbung fvfo.”‡

27 Á bungu re, “Nkpel anyehng nyi ma sa,” jia kp'tibi re, nsol nyi bo limi no bahke gbehke, fere yaange, eji nsol nyi l'k'ma gbehke l'sa jol.

28 Owo fvfo nobo re wahr kak saam, wahr ji bahke bele ejahbetul ji l'k'ma gbehke. Nong,

‡ 12:22 12:22 Gal 4:26 § 12:23 12:23 Jems 1:18 * 12:24 12:24 Hib 11:4 † 12:25 12:25 Hib 2:1-4 ‡ 12:26 12:26 Ell 21:1

wahr jo kak Esowo go mbang nyi bahk-e koro,§
a ekpunu, a elfahle elfahle.

²⁹ Tibre Esowo ebahre bi li agun nya kpo fi.

13

Elkpin ni kpo kor Esowo

¹ Soren asi go elkoro ni abonane ebahne kpo kor-n.*

² Jo buumen re, li re wahn jo vvrv ajenne. Tibre egom jindiki jia, ji limi ano, fere vvrv babenjel, jol bo kahnem.

³ Jo buumen ane ba wob go ngbekobo, wahn jol ana n tob wob ngbekobo a bo, wahn fere jo buumu ane ba bo kp'nohko bo, eji n kpeke li go njini nyia.†

⁴ Elbal li ejum ji bahke jo lub ane kpee go mbang anyehng anyehng. Kana lim erehbe! Tibre Esowo bahke lame aneb as'sa, a abalimerehbe.‡

⁵ Nong, akpohko k'jo kor-n! Ji n l'bel, nong, jo gbal-n. Tibre Esowo bungu re,
“Wa n nehm yake.

Wa n nehm sennge njahm.”

⁶ E l'lim ano, owo e bahke ma bung a esahb esahb re,

“Jehova wo li nkakebo ewame,

n nehm fahl, anv, jen ji nne bahk-m kpe ma lim?”§

⁷ Jo buumen atubesi ebahne ba bungu alum Esowo tong-n. Jo tiren bade elkpin ebo, wahn fere

§ 12:28 12:28 Jon 4:24 * 13:1 13:1 Jon 13:34 † 13:3 13:3 Rom 12:15 ‡ 13:4 13:4 Ef 5:5 § 13:6 13:6 2 Kor 9:8

jo tir bade ana bo kpo no, fere leeme ekakesehk ebo.

⁸ Jisos Kraist j'nehm ji jolo nyaane, á li ano lela, á bahke jolo ano ano go njinanjini.*

⁹ Kana taame, ajoobo ntibi nyindikandiki wer-n tahm a nahne. Tibre n'nob re eltim tahn-n tib go nnoobo nyi Esowo, go nsol alehke sang. Tibre ane ba jo toono atahm nya li bada nsol alehke, nnoobo anyehng anyehng joom ka bo.†

¹⁰ Abalimajom ba kpo loko go ebkpatahk Esowo, nsahm bo kpimm nyi bo bahke lehke ejum njom ji kun go egahre edi njom alimi.

¹¹ Tibre enyam bi, ntubesi abalimajom jo ko alung ebo tib abiafem, yel a ma go edi ji kp'sahb b'bar, bi bi bo jo song jahm bo fi go esi mbang.

¹² Owo wahnge Jisos nyehne erem go esi mbang,‡ eji á l'ko alung mame yefono antahng, ru ane, bo bar go bo abiafem.

¹³ Nong, wahr tob lohngen je go ege go esi mbang, tob song bel esono jio j'je.

¹⁴ Tibre e kpimm ejahbe go njini nyia, ji bahke jolo ano ano, e kp'sebe na ejahbe ji kp'bake.

¹⁵ Nong, wahr soren asi, jo lim njom nyio nyi Esowo atehke ngare anyehng anyehng sehng goji Jisos, nyi lohngo re, wahr jo yiimi ntianse nyi mbing enye go egahre anyo.

¹⁶ Kana yini nnoobo alimi, wahn fere jo kak atemtem ebo. Tibre ajom ana nyao nya kpo kor Esowo.§

* **13:8 13:8** Ell 1:8 † **13:9 13:9** Kol 2:16-23 ‡ **13:12 13:12** Mat 21:39; 27:31-33 § **13:16 13:16** Rom 12:1

¹⁷ Jo kaken atubesi ebahne, wahn fere woomo bo go elwo. Tibre bo ba kp'baabe atohko enyahne, eji bo li ane ba Esowo bahke bahbe bo bade ana bo limi no. N l'lim ano, bo bahke jo lim eltum ebo go eyebatahng. Tohko jol ano, bo bahke jo lim eltum ebo a aromo go nnyo. Nyaa, nnoobo anyehng anyehng wahn nehm ka.

¹⁸ Jo kaken ero tv-r! Tibre e kp'kahne re, ntim enyahre li saang, eji e kp'sebe re wahr lim ji kp'nobo ngare anyehng anyehng.*

¹⁹ N kp-n sahb gb'gboongo re wahn jo lim ano, eji Esowo l'gulu elfeere a name ba ka-n.

Es'kohro nnyo akake

²⁰ Nong, Esowo elkoono bi nyahme Ntul a Jisos go elkv, ji li egburu mbaabebul tib go alung ma egbanngalung ji li go njinanjini†

²¹ ka-n ejum ajehng ajehng ji kp'nobo, eji n l'mal jo lim mbang enye, á fere lim eltum go egahne atahng, toono o, n lim ji kp-e koro sehng goji Jisos Kraist.‡ Nong, ellub jol ka-e go njinanjini. Emen.

²² Abonanee, n kp-n gboongo re, wahn lub wuk erehke jia, tibre n nyono mmonkpehrekahba mmonwer tv-n.

²³ N kp'sebe re wahn kahn re, mmonanne ewahre Timoti, bo m-e yehke go ngbekobo. Á l'gulu elbake, m bahk-e koko ba a ne, n l'ba, ba nyehn-n.

²⁴ Kaken atubesi ebahne kpee nnyo, a aneb Esowo kpee, a abonane ebahre ba li go Itali kp-n tob kak nnyo.

* **13:18 13:18** 2 Kor 8:21 † **13:20 13:20** Jon 10:11; 1 Pit 2:25

‡ **13:21 13:21** Fil 2:13

²⁵ Nong, nnoobo nyi Esowo jol a nahne, wahn ane kpee. Emen.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4